



采山堂詩集卷三

嘉興梅會 周箕

息機菴畫壁歌

梅溪之南有精舍棟宇歲久將歆傾東西畫壁特奇偉坐令  
觀者心魂驚神龍天矯勢莫測隱隱風雷起東壁杳靄烟雲  
掉尾長倒峽傾湫裂山石戴笠胡僧搯杖前一僧供鉢立近  
肩眼光注鉢鉢吐燄去龍咫尺神怡然稍南瞞腹一僧在脚  
蹋蟾蜍笑相待細視方知點墨成初看定訝流光彩西作空  
江萬里來中天一月清輝開折蘆有客向東渡驚濤怒浪相  
喧逐我嘗過此增慨慕誰歟畫者今難遇至人墨蹟難久留  
不燬實藉神靈護左右華堂結構連鑿池種竹爭芳妍人事  
寧知有反復高臺倏忽吹飄烟飄烟燎發連天黑耆老咨嗟

籀谷





牙山堂詩集 卷三  
救不得赤練光飛雷雨隨驅龍委宛胡僧力

雙松歌爲盛奕雲賦

尚書宅上雙松樹蒼榦蟠拏吐烟霧滄桑更歷垂百年今作  
幽人讀書處幽人爾爲誰云是盛孝章生平豁達好交友往  
往下榻留中堂我昨曾偕李生過芒屨直蹋蒼苔破披襟解  
帶共徘徊炎歊六月清風大見說茲堂全盛時門前飛蓋日  
參差銀鐙華月流清照錦瑟瑤笙韻晚颺一時榮悴俄然改  
世事遷移定誰宰軍騎屯營恣躡蹂可憐留得雙松在雙松  
翦翼若鸞停出險欣看色倍青羨君體物真解事爲作朱闌  
架翠屏元卿竹下流連飲前有求羊後徐沈亡慮詩歌數十  
篇皆惟二子能題品我本窮途落拓人經過欸欸接情親才  
疎不耐爲長句對此虬枝欲愴神主人藏書萬餘卷期我同

看情繾綣天假餘生更十霜摩挲此下研窮徧漢植秦封那  
足觀丈夫意氣重金蘭持杯酬爾應須記好共青青保歲寒

硤山尋素兮上人

嵐光蒼茫烟霧凝竭來西硤尋幽僧斷崖紫藤挂千尺白雲  
埜竹深層層茅菴數間空谷裏落葉蕭蕭滿溪水抱琴每愛  
彈清商坐令風雨林中起叩關相見情依然茶爐發火生新  
烟言深不知日將落持瓢更挹松根泉嗟予落莫常羈旅一  
別雲山復何處還期得得下叢蘿清秋訪我梅花渚

送高念祖入都門

秋風蕭瑟城東路相尋遠入叢祠寓僕馬匆匆行色催問君  
何事燕臺去燕臺駿骨正相求豈爲黃金作遠遊此地從多  
慷慨士乘時亦擬抒奇謀君行到處逢迎徧文藻翩翩誰不



羨詞賦鄒枚自可期屠沽毛薛還應見雙溪流水近移居去  
後鄉園霜樹疎關河儻見南飛雁好憶樓中錦字書

送朱十彝尊之維揚

人生知己良難遇別時長久俄時聚寶勝橋邊一櫂輕送君  
重上維揚去維揚此去莫傷情來往無過十日程作客依人  
隨近遠滇南萬里會須行李家兄弟才多妙幕府聞聲沓相  
召絕徼西南歸未期與君且得同歡笑尊前追憶故交疎却  
悔當年誤讀書屠沽亦自有投分不似吾曹長索居

白蓮寺日本書歌

撥櫂胥江歸重遊白蓮寺古殿深沉欄檻高霜飄木葉空中  
墜慘澹莓苔粉壁青縱橫駭見龍蛇字云是當年日本船乘  
風遠自扶桑至波濤失所歸不能獸奔鳥竄難深治千里東

南戰血腥紛紛姦宄因爲利城郭荆榛井邑墟可憐梵刹來  
屯次去日書留寺壁間蒼茫莫解其中意想見提刀握管時  
情難去住雙垂淚遠人亦自有英豪力盡途窮衆無異我來  
觀此增惋傷反復空論往時事同遊朱子工篆文蝌蚪蟲魚  
悉皆識沈生好古博羣書怪跡竒踪尤酷嗜廻環莫辨一畫  
端體勢難尋六書義歲久猶然墨未渝字雖不識形堪記摩  
挲其下心恍然爲憐爾亦能文類重譯輜軒兩莫過千載憑  
誰諒斯志吾徒落魄每去鄉到處新詩興常寄驛舍禪林爛  
漫題經過但作尋常視此書壯偉今幸存爲語寺僧休掃棄  
誰當摹勒作小碑得令好事相傳致

曹秋嶽先生出所藏金石手蹟及朱紫陽手製墨二笏  
見示因賦



同山先生好古蹟金石奇文手摹勒吳中好事今幾家錦軸  
牙籤誰與匹文士過從每出觀神明煥發照眼寒藏者維艱  
觀者逸如得美食忘朝餐解囊更視二丸墨奕奕精光如點  
漆歎識猶然是紫陽數百年間遺手澤紫陽學術貫天人小  
物區區自可珍古來藏墨思諸用獨此堪留百代新

春夜同李天穀金左佩史人肇飲金以貞宅時以貞方  
舉孝行爰作歌贈之

天風蕭蕭積陰靄竭來就飲草堂內握手尊前半故交歡呼  
不負平生愛銅盤燒蠟四座光羨君子姪能文章菁蔥玉樹  
繞階砌勸客數起催飛觴銀絲斫鱠吳鹽白玉盃春醪浮琥  
珀倒意傾心醉不辭聽君慷慨論疇昔自憐少壯逐風塵甘  
旨晨昏爲老親脊令飛鳴雁行斷撫孤那得辭艱辛只今成

立粗相保故舊相逢須醉倒析義論文春夜長樂事無過讀  
書好俯仰天倫兩不違歲寒霜雪表音徽古來孝友誰不羨  
今代求君良已希

觀申蘭芳草書歌

吳閭文定之女孫作嬪君子來高門隱侯世胄多慧業四壁  
欣看圖史存樵李城東萬家室香溪流水潺湲碧縫雲閣上  
組繡閒古硯摩挲匣中出紗牕曙影正遲遲檻外春烟拂柳  
絲霜箋百幅列文几坐看揮灑須臾時咄咄草書誇絕代見  
此誰能不珍愛屋漏錐沙筋骨藏簪花豈但妍姿態書罷從  
容卷帙開清吟時復步蒼苔簾垂未許燕飛入風起那教花  
片來角里人稱褚夫子健筆縱橫世無比自訝年來手腕慵  
却憐閨閣聲名起伊余落魄久風塵書法無從一問津轉憶



當年王逸少臨池曾學衛夫人

· 蛀硯歌爲東關文公作

文士有習好惟硯爲第一紫雲截玉潤且溫最說端溪水坑石文公方外侶癖與文士同故人宦南粵貽贈情彌隆圓壁方珪殊體勢獨此驚嗟與世異中有竅穴左右穿剝蝕宛與蟲齧類吾里王方伯爲作蛀硯歌鑿深千尺良不易偶然獲此誰云多吾聞此硯未曾見三復此歌增慕戀人生好尚雖萬殊至美何能不矜羨寂寂禪關梧竹深芭蕉叢葉披濃陰含光發墨如點漆誰識高僧娛悅心匣貯蛟龍還什襲漢鼎秦彝安足匹他日要余共賦詩更教此硯摩挲出

觀巢修上人爲余從弟林於所畫山水因作歌兼呈休公

性本愛丘壑頻年樓市塵不知何歲月得謝區中緣天台石梁夙所好香鑪匡阜情空懸谿西有精舍駐錫多高賢就中二老往還最瀟灑翰墨誰能先新詩百篇擬清畫兼之圖畫超巨然吾家惠連抱竒癖愛畫愛詩情汲汲昨得橫披山水圖令余恍惚心如失遠山秀絕不可名明霞幾片開赤城層崖深樹忽中斷瀑布遙疑風雨聲滄江澄碧縈如綫烟嵐雲氣須臾變蕭然坐我一室中萬壑千巖眼中見塵世誰知有鬱煩高吟三復勝瑤琨何當攜手東林社松月風泉與細論

朱開子座中作歌與項子介

入春纔欲半芳草倏已積愁坐荒齋風雨深故人一二悲離隔昨夜扁舟到葦門與君相見拭啼痕風塵瀕洞今幾載世事遷移那足論襟期舊識同瀟灑未得幽棲向林野君問成



都賣卜人我從吳市吹簫者憶昔山人王與徐王翊介人徐真木士白  
 相過設醴薦嘉魚高堂賦詩幾為樂余亦時黍末座餘誰知  
 生死殊轉盼弔賀須臾未終宴霜落終看碩果存世間美好  
 何須羨此日重逢朱阿游能持斗酒為君謀布帆慢逐東風  
 去更作歡娛十日留

紫微山歌送胡天岫移居之硤川

東風吹烟綠芳渚送爾移家復何處紫微山色嵐翠重蘭楫  
 遙看此中去此中高隱君故人藥鑪茶竈歡相親陰崖茅屋  
 結未久陽谷蘿軒構尚新昨夜淙淙山雨急瑤草竒花盡沾  
 溼今朝君去天更晴愁絕青峰向空立與君本擬結同心那  
 知離隔共沉吟我留市井人爭賤君傍雲山詎易尋世間萬  
 事真難料智士翻為愚者笑樵李行歌且負薪渭濱不遇空

垂釣紫微山北讀書臺朝發蒲帆日暮迴為道相思難解釋  
 扁舟月下更能來

橘鶴樓歌為大梅禪師作

橘鶴樓橘鶴樓誰歟造此今惠休當年長汀嗜米汁同龕此  
 日行相求此樓縹緲出天半躡足但覺雲烟浮高陽酒徒誰  
 者是東蒙屠廷楫朗山沈傳弓來上頭舉觴一醉發長嘯山鳥驚

起林猿愁長歌慷慨鬼神泣脫屣富貴輕王侯我生亦有嗜  
 酒癖劉伶阮籍差能侔杖頭百錢那易得尋常酒債終難酬  
 橘鶴樓我昔聞此今始遊主人有酒不自惜喜我一到相攀  
 留水芳山藪雜浦筍粲然羅列同兼羞吾儕落拓眾所棄此  
 中偏許聯吟謳兩君先我得佳句蒼茫四壁開滄洲摩挲醉  
 後一再讀不覺涕泗交頤流主人由來味禪悅憐才慕義情



何優流光百年信轉眼今我不樂非良謀憂從中來且撥置  
母多酌我醉即休世無李太白誰爲董糟丘憑闌四望極千  
里暇日可以消煩憂君不見橘鶴樓

胡天岫墮水歌

君不見陽羨書生真絕竒性情落拓世共知孫登出水每大  
笑知章水底眠何爲又不見休陽主人好賓客兄弟聯吟永  
朝夕傾心倒意高陽徒十千沽酒何曾惜今年四月霪雨多  
相思一櫂浮烟波忽驚失足逐波浪蛟龍窟宅還經過到來  
衣袂牽蘋藻容止如常堪絕倒知君潔已本無汙少爲形骸  
潤枯槁同舟相濟豈不憐得失俄頃良有天只今出險得至  
樂且與嘯歌偕醉眠

送高念祖之金陵

前年君作薊門遊雪花如席飄重裘今年十月雪花白愁君  
復作金陵客叩門別我情苦深去住便覺雲山隔清尊永夜  
暫流連吾輩行藏盡適然扁舟曾泛五湖裏負耒還期十畝  
前有才那得終淪棄龍門况復相推異吾家公瑾謂介擅高  
名與君累世通交契龍蟠虎踞石城雄挂席長江旦夕通菰  
蘆倘念窮交在早寄音書檣李東

登縹緲峰同柯寓匏作

包山竦峙波濤中其下不測潛蛟龍荆蠻荒服向千載句吳  
始封成霸功靈威丈人爾何有十有七日潛行久玉柱金庭  
尚可探丹書碧簡今存否竭來欲極高與深非君誰復同幽  
尋崔嵬縹緲插霄漢天風颯颯吹衣襟茗雪奔流日東注滌  
洄那肯須臾住元氣茫茫萬頃中風帆倏與飄雲度飄雲變



幻自朝昏還從匹練望吳門羣峰蒼翠時隱見羅列水面如  
兒孫乘舟昔有鴟夷子只今却望空烟水飛鳥良弓固可虞  
千金安用重居市嗟余失路多苦愁寂寞翻為山水遊采芝  
當逐漢初老角里烟雲早共求

登莫釐峰

震澤三萬頃羅列七十峰莫釐與縹緲巔巒相長雄昨登縹  
緲天風急惆悵羣峰望中失莫釐今日何太奇我來正值烟  
雲移浮蒼點翠豁心目環迴歷歷如行碁當年底定神禹績  
玉簡金書洞中出將軍莫釐空著名碑碣無傳晦遺迹我遊  
兩峰間往事多憑弔柳毅祠邊古井寒毛公壇下空斜照誰  
道山中不可留平生結想在林丘重來幸有同心侶不負烟  
波一釣舟

贈張山人

鹽官山人張叔子少壯豁達今暮齒平生肝膽吐向人羸言  
布諾非徒爾自言嘗慕楚三閭懷沙哀郢情煩紆酒酣耳熱  
一把讀不覺涕泗沾衣裾又愛蒙莊齊物論人間逍遙得無  
悶濠梁魚樂心自知寫向生綃沫長噴為余放筆繪赤鱗下  
有文鰕衝青蘋閒房展玩意瀟灑恍然如在江湖濱我交山  
人今數載夙昔襟期終不改玉液金丹鍊未成青松白石盟  
猶在嗟余涸跡近牆東幾得追隨白兔公看君明發乘槎去  
浩渺烟波萬里空

冬日懷查韜荒徐初鄰客漢陽

十月多悲風吹我庭前樹寸心忽不懌欲語向誰訴平生故  
人多遠遊城南往還誰獨畱可憐徐穉翻下榻醉我累夜同



余稠查生遠自滇中返意氣如雲笑偃蹇男兒莫後四方遊  
壯年倏忽成衰晚此日翩然早戒裝征帆旦暮入湘江洲邊  
芳草迷鸚鵡臺上浮雲蔽鳳凰余時去家方暫出悔余不送  
心如失管鮑由來擬弟昆雷陳豈但同膠漆歎茲離異遠飛  
翻悵望雲山千里昏憔悴漫傷漁父問依棲終賴信陵恩人  
生聚散真難定同聲自遠能相應楚中屈賈舊多才逢迎到  
處交歡罄聞說明年更入燕黃金臺畔草芊綿青門三月鶯  
花滿倚醉當壚若箇邊

曉行曲

城頭月落雞初鳴鼓四起坐鼓五行霜華滿野馬蹄滑出門  
莽莽雲山濶閨人挽衣雙淚流子啼女號愁復愁誰能骨肉  
更相顧萬里揚鞭且西去

雨牕言懷

蕭蕭雨若絲髮微中庭落葉高下飛幽人獨坐愁掩扉此生  
虛擲良可惜修名未立髮早白回也屢空非計失牀頭有琴  
復有書朝彈暮讀情何如中懷慷慨那得舒

觀澄懷堂靈壁石山歌

主人堂中一片石識者爭誇自靈壁瘦骨巉巖類削成竒姿  
猶帶烟霞色當年鑿者知謂誰雷雨中夜山根移前賢賞鑒  
凡幾輩劫火亦復遭流離叢棘荒榛掩霾久土花繡蝕看來  
醜綺麗紛華世所爭蜿蜒卷石人何有咄哉盛君嗜好迂甄  
別獨與流俗殊搜竒抉怪情未已見此不覺增踟躕售之那  
惜困中粟洗發晶熒耀雙目沙眼排空露石稜蘚痕剝盡通  
山腹麓平如砥勢嶷然脈絡縮結左右穿窪為潭澗亘巒嶺



蹲若虎踞蟠龍眠垂崖側壁疊無數只少流泉與松樹暇日  
披襟相對時宛然不異山林趣我來正值天沍寒主人酌我  
酒欲闌摩挲撫汝爲長歎遭逢知己良不易慶汝人今拭目  
看

題徐序仔漁舟納涼圖

六月炎蒸熱如煮我欲避之無處所忽思擊楫凌空濛飄然  
直上瀟湘浦咄哉徐生得我心畫作此圖春竹深烟江涼月  
在漁艇橫笛一聲龍夜吟舟中之人意瀟灑不道姓名誰識  
者尊中有酒飲未盡遇我狂歌手重把軍麾萬里深荆門鐵  
騎四集如雲屯此圖可對不可即漁父滄浪難具論

懷翰周

草堂日風雨獨坐心不憚庭梅未成花慘澹傍檐隙入春半

月韶光催寒陰漸解襟抱開欲買蘭舟更東下與君花底一  
銜杯

丁巳初冬同毛生績宣過解公橘鶴樓時績宣爲余圖  
像因作詩紀之

十月之望自魏里還舟更復來尋此文場酒社不乏人獨許  
緇流作知己吾生狂放無町畦馳車到處皆成迷角里東偏  
瘦腰者謂沈傳弓邀我頻數來雙谿誦公精舍隱叢樹醉墨淋漓  
共題處爲言解老知我心橘鶴樓頭醉無慮何知夜壑移藏  
舟死者已矣生多憂重來不覺兩衰老霜葉撼撼風颼颼四  
明毛生苦追逐到此識我心所欲解衣盤礴圖我形位置分  
明在巖谷從違去住皆適然形神縱肖何足傳但願同龕有  
彌勒不妨更號酒中仙



題朱復樵七真圖

朱君有圖圖七真化身百億總一身偶然遊戲弄翰墨隨類  
發現皆全神萬物森然彌宇宙出機入機本同殼羨君手握  
造化權變化無端悉吾舊風雅辭賦箴規銘古偈真誥離騷  
經描邈贊歎無不具文字直可通仙靈曩行今止無特捺罔  
兩問景相嘲調雨竿晴斧皆適然有待何如無待妙顧余行  
徑頗怪竒商賈馬牧牛獸醫少爲都養老都講雜好星卜書  
琴碁比來少得文字樂寢食興居成笑謔卮言日出和天倪  
筆止與止作與作諒君繪畫理亦然吾心則一形有千與君  
莫逆相視且一笑幸勿拘拘刻舟求劍泥跡行住坐臥漁樵  
仙

觀沈同文平沙射獵圖

風吹黑沙射人面勁弩交加疾雷電馬蹄蹶踏圍合重百獸  
奔騰眼中見就中紫髯意氣雄獨礫一虎衣血紅抽刀自割  
小麋肉熾火旋炙饑腹充誰歟寫此鹽官沈妙年學畫臻神  
品叢祠偶遇出相觀目眩神驚毛髮凜吾生跼蹐守敝廬鑽  
研簡冊同蠹魚何當逐爾負弓劍絕塞窮邊縱所如

題雨夜止宿圖

雪坡爲  
碧巢作

天馬有伏櫪神魚故潛深人生未遇亦如此飄然四海誰知  
音顧郎才藝孰與比家自琴川來攜李相逢不異昆弟親和  
女倡予同色喜梧川主人稟異資一堂花萼連瓊枝高風特  
搽實所慕不肯汎愛華文辭竭來把臂恨不早促詠催觴恣  
傾倒雨牕弄筆畫此圖宛見茅堂對幽抱是時首夏多濃陰  
高梧修竹窈以深此中擁書萬餘卷日午倦讀橫鳴琴查生



同我館三載落拓襟期終不改座間側帽旁指揮狂奴故態  
嗟猶在自來良會不可常蘭亭梓澤成滄桑風流至今得披  
覲所賴筆墨傳芬芳吁嗟顧郎洵奇絕森然武庫曾羅列山  
林豈必老吾徒孰是王良馭蹄齧

題朱復樵畫麒麟閣功臣像冊子

顧郎邂逅推博識妙繪更遇武陵客主人池館清且僻宴罷  
張燈還促膝香幽茗潔興未極手探囊篋開畫冊漢宣軫念  
股肱力麒麟畫像人十一冠大將軍殿屬國亞爲富平及龍  
額蒲類屯田殊上策中興賢輔相與吉建平法律承世則陽  
城黃老梁丘易東海蕭生不辱詘上匡吾君民下澤濟濟多  
士扶社稷朱子手腕能寫出冠裳纓佩旌斧戟豐偉精悍頎  
挺皙光彩流動遞相射令我披視心怵惕功名烜赫鬼瞰室

始終無危貴閱歷子孟沉靜事詳核殿門步履不移尺功如  
蕭相疇爵邑禍萌驟乘真可惜亡書三篋能記憶尊爲公侯  
勤索筆身衣弋綈婦紡績內憂瘦懼形顏色韓趙立功在疆  
場雲中萬騎獻俘馘繩武頽當邁勲績保身固寵詞遜抑千  
里過師從枕席金城保障全碩畫七十老臣齒衰劇馭吏能  
容醉飽失舊恩陰德報未獲博陽受封病加紼四方異聞輒  
奏白勵精爲治練名實公卿稱位領衆職丙魏相繼聲奕奕  
合和朝廷議平直功比朱虛官免謫苑馬多死奴乏食家千  
里駒譽超軼宗正屏藩稱表率訟子鑄金獲譴責瑯琊蘭陵  
進儒術旄頭劔挺驗占測近幸給事心周密差賢京房身自  
賊稟性素剛立每特牢獄怏怏心豈塞趣游和藥鳩飲盍殺  
我賢傳上却食咄咄汝陵嗟汝律丈夫斷心死已必十有九



年匪轉石齧雪旃毛幽窖側羝乳得歸歸豈得上林雁足書  
繫帛前此十臣誰與匹甘露年間崇禮秩報祀英靈歆饗矜  
竹梧滿庭忽蕭瑟牕風吹燈燈影黑顧郎酒酣神氣溢主人  
揮灑同迅疾前者爲作後者述顧我持論踈考覈詩成惟有  
三歎息古人不見見遺跡實藉好事相傳譯擁衾不寐終永  
夕更欲與子言疇昔

同雪坡飲橘鶴樓作

平生去住隨所偶古寺白蓮投宿久不爲解公契識深何能  
數數開歡口剡藤作幅五丈餘每成歌詠輒細書往來有年  
半塗抹一爲披覽心茫如憶昨夏五雷震瓦東行檝檝茲樓  
下懷人感物歌慨慷以後題詩誰繼者只今春盡方清和得  
攜狂客重經過忘形不識孰賓主斗酒未罄顏爲酡干戈載

道多反側骨肉猶然不相恤吾徒幸藉筆墨靈總是窮途尚  
衣食顧郎遭際余畧同取信只在一語中傾筐倒篋如舊識  
醉後賦詩雙炬紅二阮謂沈武功麗臣當時竹林飲何期一旦風流  
盡後來縱不乏新知念舊潛然淚潛隕解公解公聽我言文  
人儂薄多負恩我今且反屠羊肆投老終須向獨園

羈旅行次高季迪韻

墮耳流雞天未白霜風吹葉聲策策茅屋晨炊始得過計程  
早是一舍多未出門時家已壞破屋荒田已無賣只殘一畝  
種田園荆榛布塞不可言朱門投謁幾相識囁嚅欲語何能  
得遙念家中斷炊黍哭女啼兒亂如雨賓筵歌舞一醉忘入  
夢星星作愁語川原豈敢辭苦辛詩書不救骯髒身屠沽雖  
賤妻子好莫笑夷門抱關老



送王秋槐之東粵

君不見仲宣竒才不可得凌厲縱橫更誰敵  
威蕤丹鳳見亦稀天矯神龍變難測  
君家令弟誠二難折獄論文有兼術  
燕寢香凝竹下琴訟庭日永花前弈  
對牀苦憶聯吟者萬里傳書趣  
行役五月炎蒸大麥枯解纜長河候  
風色翠挺琅玕竹葉披紅殷瑪瑙  
榴花坼不憚舟車路五千惟矜囊篋  
詩三百錦石山邊問古遊越王臺畔  
空陳跡舟落珠江定幾時脊令飛處  
征帆急嗟君遠遊我何惜汗漫雲山  
去無極應念鄉園送別人西風夜望  
南鴻泣

寄懷朱十彝尊東粵

東粵迢迢五千里望眼不極悲歌起  
南雲滅沒鴻雁稀鯉魚風落珠江水  
故人別我今兩年辭親作客真可憐  
江流浩渺

波浪濶嶺樹稠疊空寒烟羊城象郡  
通炎澥尉佗遺跡今猶在憑覽應多  
慷慨歌南中山水遙相待窮途知己  
古所難况復末世交情寒君才自足  
動卿相豈直布素爲交歡平原置酒  
開重幙雄論高談氣如昨流連歲月  
欲忘疲莫謂異鄉殊可樂高堂垂白  
筋力衰願君早歸無復疑衡門泌水  
可終老勿羞貧賤忘鋪糜

太湖歸渡

舟從胥口來徑渡西山麓今朝歸櫂  
發東山渡闕新涇路彌促瀾漫十里  
間風浪亦不小銀濤如屋爭喧歷隱  
隱雷車四旋繞傍人失色從者驚吾  
徒笑傲如平生區區夷險何足道他  
日滄洲萬里情

觀臥龍松歌



吾聞松柏稱後彫歲寒不逐風霜飄何事秦封五大夫至今  
往往猶遺嘲包山五湖中老榦實無數上方遺址石梁西離  
竒若有神靈助翠鬣森森風雨垂蒼鱗疊疊烟雲附南陽諸  
葛號臥龍當年不起如爾松何期三顧感知已鞠躬盡瘁要  
之死松乎松乎好自持風雷振拔會有時斧斤摧折如不惜  
疇識人間梁棟姿

同懸公徐松之登鷹窠頂觀合朔適遇顯武因書所見  
寄晉賢

君不見鷹窠之頂真陡絕瀛海潮生勢騰決峩然突兀當其  
衝萬里扶桑歟明滅十月合朔東南隅晶熒摩盪光彩殊蒼  
烟內湧紫玉珮赤霞外抱黃金樞我聞此勝亦已久束縛塵  
埃苦奔走今年決計來獨登何期却與徐君偶遠公高興亦

不凡擔囊策杖探巉巖夜半起坐候天色那惜草露沾衣衫  
銀漢微茫星粲粲北斗闌干望初轉啟明冉冉出東方朦朧  
島樹遙難辨怪聞笑語披荆榛錯愕相詢是故人世間良遇  
不易得况是山巔更海濱寒氣稜稜苦淒薄衾裯擁蔽同帷  
幄久之不見太陽昇碧雲遮斷如城郭雲開日見二丈餘盡  
詫往說爲空虛惘然歎息下山去回首忽見竒光舒兩鏡依  
稀齊上下精華萬道遙空射嶺岫渾如映雪開波濤恍若鎔  
銀瀉山僧向我稱絕竒二十年來一見之羣公覩此殊可幸  
非真好事誰能期汪君高懷人莫及山水招邀屢遊集爲作  
斯歌遠寄將春來沆瀣還同吸

早春同諸子過就雲軒主人出文衡山山水見覽因各  
分賦



去歲苦寒積冰雪他鄉轉客歸何遲入春幾日見新霽溪上  
已發梅花枝室人交謫米薪絕家事不任筋骨疲東郊舊樓  
大小阮前者曾約娛歲時解憂且須急一往枵腹不待成晨  
炊中堂先有數子在連夕促飲催賦詩日晷初永得舒暖爰  
出妙繪欣同披中有待詔山水幅元氣充塞何淋漓高峯凝  
日暑不到飛瀑激風涼在茲幽人相對寂不語瞠眼各各如  
有思纖埃盡爲泉洗濯喬木半屬雲推移恍然坐我巖壑裏  
狂吟清嘯咸所宜回憶平生劇夢寐徒然星髮霜其髭壯志  
不展良已矣誰復窮途能逆施夷齊餓死盜蹠壽勸君莫訝  
天公私吾徒願學在安分流行坎止隨委蛇主人潑醅重酌  
我旣醉萬慮俄忘遺長安裘馬漫炫赫曾聞取譬同弈碁不  
如共醉陸沉輩聊與昔人同所期

乙卯秋同慈谿王白民海寧許潛飛平湖沈進之同邑  
俞右吉項媚雪東井盛奕雲集秋嶽先生倦圃

亭亭高岡梧翔集多鸞凰泛泛長河萍聚散非一方蠡湖西  
畔名園啟脩篁古木森相倚主人本是重龍門時艱實藉東  
山起竭來休沐暫優游賓客伊誰羊與求君公乍稅牆東駕  
許掾仍挈海上舟薛蘿山徑參差入珍簟湘簾蒼翠襲藕絲  
冰水雪且調袒跣不教煩拱揖深杯百罰語初譁須臾謔浪  
還交加東阿才濼故無敵楨粲追隨良足誇縱步披襟就重  
樾峯巒橫亘驚竒絕林勢初分夕照平溪光忽漾寒沙濶篔  
也屠沽市井人過從亦得追清塵馮驩長鋏非所託侯嬴高  
義徒相詢豺虎中原方格鬪霪雨誰能補天漏酒醉能參一  
座先詩成畏落羣賢後夜深激電搖巖扃短燭欲滅光青熒



臨堂窻窻荔衣動疑有山鬼來前聽時清佳宴不易得况此  
軍興四征日殷憂自屬老成謀整暇方歸濟時策雨蓋雲車  
惜轉蓬城隅咫尺判西東會須旌節江干駐待看輕裘緩帶  
風

蟄菴齋觀錢舜舉茂叔觀蓮圖

晴波蕩漾開橫浦萬朶芙蓉嬌欲語屋上青巒疊翠烟亭前  
斷樹通平楚借問誰能爲此圖云是當年錢舜舉錢生得名  
三百年墨蹟矜貴希流傳知爾平生頗好事買此不惜傾囊  
錢吾家茂叔真瀟灑春草叢生滿庭下薰風六月水檻涼羽  
扇無須手中把荷葉青青花白紅生機天趣與我同只今想  
像猶在眼轉歎前人摹畫功蟄菴鄉居有林沼種菊栽松聊  
寄傲萬卷圖書肯借觀眷言同姓諧歡笑此畫披尋意最深

愛蓮傳說至於今山中麋鹿行相待把臂同君早入林

姚山人畫山水歌

隱鷗山人善繪事持筇昨自華亭至神理蕭閒頗自矜含毫  
潑墨良非易一圖繪就旬月工千巖萬壑開洪濛直訝高堂  
逼蒼翠何知絹素生長風白雲半出蒼松杪元氣淋漓天欲  
曉斷壁遙看飛鳥高平沙下見行人小虛亭捲幙坐者誰握  
書良久目不移置身丘壑良已足勤苦笑君何以爲

題沈石田先生溪山圖

平生頗愛溪山遊溪山到處皆淹留邇來苦爲塵土縛衣食  
奔走無時休眼明得見此圖畫心境忽覺成清幽重山疊嶂  
雲出沒修篁灌木風颺颺村農野老各有務壺漿餉盃來田  
疇樵人腰斧漁布網竊笑各自爲身謀始歎人生少閒豫况



復濁世多戈矛先生筆墨不易得真蹟豈但千金求吾生雖  
不識畫理紙上但喜烟嵐浮平波浩淼遠無際五湖萬里來  
扁舟同憂相救世尚有不遺故舊今無儔古人貴自食其力  
種瓜去逐東陵侯

偏側行

偏側復偏側天馬在廐鸞在柵騰空萬里已蹶蹄揚彩九苞  
還鍛翼駑駘亦有幪錦時鸞鳩枋榆副所期英雄失路庸俗  
笑高亢未肯同詭隨西施浣紗耶溪畔嫫母無鹽不相喚可  
憐未入吳王宮縱然絕色人誰歎新豐市上高陽徒日常醉  
酒歌烏烏磊砢總非梁棟器乘時未必無良謨浮雲四集悲  
風起壯士將行臨易水丈夫許身良不輕一諾何曾辭不死  
人生少盛時幾何倏忽不異流電過太公八十後車載此老

之外曾無他偏側偏側安所望仗劍勉起旋仆僵君不見賈  
生年少餘慟哭可待馮公白髮郎

醉歌行

桐川汪氏齋  
同顧雪坡作

對酒便成醉醉時還放歌燭光如月照四席酒杯灑灑搖金  
波主人本是孔北海酒滿尊中欲誰待周郎狂發顧郎癡淋  
漓縱筆千言在碧梧高枝棲鳳凰鸞鳩適志捨榆枋人生投  
分各有合吾屬得母同酒狂君家兄弟連枝樹合蔭扶疎綠  
雲聚讀書多具經濟才未肯沾沾守章句扁舟昨自茗上還  
銅官離墨曾躋攀幽深潭洞以百數善權玉女雄其間披襟  
酒半談疊疊山水荆溪信竒偉虎頭揮灑摹作圖倏令蒼翠  
流屏展我時墮憤頭岑岑大叫不得徒呻吟請君更潑墨一  
斗寫出荆軻一片心



醉歌次放翁韻

含飴抱孫行作翁萬事皆若過耳風菟裘速營吾將老萬事  
不須問醜好較人事事輸一籌自感蹇拙靡所憂亦不羨千  
鍾粟亦不慕萬戶侯亦不諂東家書生官五馬亦不奉西家  
田翁犁十牛從渠五更霜華拂袍袖從渠六月蟣虱生兜鍪  
蝸牛有廬一間足斷不學橫奪鵲巢如彼鳩下牀得臥夢亦  
安斷不學元龍高臥百尺樓醉來屢舞醒屢謳大笑世人刺  
促不得休

和放翁貧甚作短歌排悶韻

莫契濶有瓜葛斗水車中涸魚活善俳諧笑口開黃葉便止  
兒啼哀從來剗愁如剗草旋剗旋生壯及老讀書餓死溝壑  
中悔不屠沽更業早陶公叩門實爲飢并無車脚成晨炊乍

可乞食向道路切莫衷告前交知

放歌行

別時常作數日惡未別不知相聚樂別多聚少摧壯顏壯顏  
一摧無可藥美人一去如電過豈無他人不如箇夢中握手  
笑語溫醒來恍惚真無那此心有似三活碁轆轤反復無已  
時此中意緒我無隱但是知音已儘知

雪坡有謔研詩戲爲研答

陶泓先生咽不語爲怪顧郎嘲謔汝吾攜片瓦頗自珍度寒  
與寒暑與暑片瓦自逸陶泓忙研磨自勝囊中藏有時縮龍  
蛇有時輝鸞凰有時雅頌歌廟堂竭蹶惟我佐汝旁何爲欺  
我少武口恣加詆毀森鋒鋌我欲舍汝去烟雲杳茫茫願與  
周郎片瓦並馳逐醉墨一斗闌入無何鄉



欲捨

欲捨筆墨無可做終年亦怪埋頭坐淮陰十萬多益辦手縛  
一雞真所懦請看雨立楯陞郎豈不身材長且大

醉後率爾作

磨磚作鏡鏡不明石田下耕不受耕貧家讀書那得成雞鳴  
狗盜孟嘗客賺人已出秦王城

次十二辰生肖成詩

碩鼠碩鼠我謂汝汝入牛角安可處從來騎虎不得下兔非  
三窟死無所白龍魚服困豫且大蛇當道赤帝誅且教馬牧  
守卑賤屠羊返肆休踟躕獼猴土牛亦何滯車如雞棲不得  
志樊將軍是殺狗徒生食猪肩快人意

過大梅解公山房兼柬東蒙

黑雲騰空如走馬疾雷破山風振瓦輕舸逆浪難遽前咫尺  
不到精廬下須臾澄霽沿林隈主人喜客顏為開解衣盤礴  
蔭叢樾茶瓜既進觴壘催倒景輝輝射檐角滌洄浦淑烟初  
落當年憑眺共酣歌九原此日難重作謂武功麗臣舊事宗雷繼  
者稀忘情猶復淚沾衣東蒙老去身仍健寄語春來共采薇  
一峯草堂看花歌同陸辛齋朱竹垞查夏重湯西崖分

賦

九十日春不可駐玉河穉柳青漸濃官溝滌穢難墊足何處  
得看林壑重人言侍讀新築好紫丁香結干枝穠辛齋竹垞  
吾老友不嫌策騎參支筇查生叩扉湯生起顧我一笑偕過  
從是日天朗惠風細晴絲冉冉烟茸茸莎亭擁腫歌四柱花  
氣遠接檐前峯縛樹老藤更天矯如割左耳驚潭龍縹囊欲



天山堂詩集 卷三  
三  
坼尚未坼已見小尾游黃蜂主人朝回跋草履揖我得觀冰  
雪容食單藉地任箕踞脫畧禮法便踈慵騰觚凍醪賸百末  
飮盤雜果儲三冬吾家長水塘一曲白鷺繡鴨紛游溶油菜  
花香蠶豆熟貓頭筍迸芹泥鬆及基山東審山北麴塵波暖  
浮方舫撫琴久已謝宗炳鑿穴今復輸臺佟自從騎驢入燕  
市魴鯉去沼鷓閉籠得閒曠論厠坐末一洗膠固從來胃銀  
絲切膾韭登俎更留午飯餐冬春何當清暑復來集醉看夜  
合花惺忪

吾衰矣擬方秋崖次韻

吾衰矣吾衰矣面皺髮黃奚所似奪巢不學林中鳩求穴豈  
同牀下蟻生事曾無十畝田虛名空費千番紙初聞蝴蝶夢  
莊周更聞猿鶴化君子此理無煩窮詰耳漢執戟楚湘纍離

騷太玄誰是非滋蘭九畹寃安在一區郭上今何如勸君莫  
說屠龍手將欲近前還被肘維南有箕北有斗君不見有唐  
陸九宋歐九身雖已亡名不朽竹林諸賢慮禍深不然豈肯  
荒於酒鼎鑊在前刀鋸在後苟獲死所於我何有人生義命  
受之天當其所遭無可走紛華戰勝癯者肥羽翼旣成從所  
飛世人得路亦如此千夫唯諾隨指揮人將曰其賢乎我應  
曰有命也伍胥韓信皆英雄未遇還同行丐者夜中不寐譙  
更起投管茫然咽無語桑榆非晚古志之爲勸休歌吾衰矣  
張爾就以畫竹見貽賦此謝之

古來畫竹凡幾家子瞻與可人最誇新枝老榦矜直節風淒  
雨苦還欹斜由來此技通書法筆勁不異錐畫沙近者誰能  
王元與魯孔孫孫片幘尺幅羣驚嗟山水花鳥習者衆丹青彩績



徒交加此君品格類高士清標迥絕輕紛華名流擅此不世  
出南海有客何清嘉裴公島西一邂逅識我名姓相留遮爲  
言昔在平原座得諷詩句知心遐揮毫拓紙只俄頃百竿瘦  
挺捎龍蛇當其結構蒙密處有若篆籀傳羲媧宛然坐我林  
壑際輒令幽興隨烟霞梅花溪上舊宅廢待移茗水棲蒹葭  
愛君且欲數相見肯惜百里輕舟挈

仗劍圖爲查聲山賦

投却毛錐莫須把直欲揚鞭突騎馬看君意氣萬丈高龍泉  
太阿知我者胷中五嶽剉未平少小學劍今向成長風破浪  
良所願蛟龍橫絕難爲行賢豪千慮還一失自古儒冠誤經  
術既笑君卿謁五侯寧知夷甫營三窟查生查生美珪璧士  
衡入洛年華匹但須持此擬報恩無輕位置荆高側

觀太學石鼓歌

石鼓傳自周宣時文字奇奧誰識之寶雞千年始得出剝蝕  
半若蛟與螭自甲至癸數凡十車攻馬同句相襲仲尼刪詩  
重典雅何獨此詩失編輯有元輦置燕京都明列太學存遺  
模其文簡策備傳載紀之歌者韓韋蘇我來觀此心膽肅良  
久摩挲不能讀式瞻宮牆凜如在古學或可相追復竹垞吾  
友考核多其間傳寫紛淆訛揭之墨本細參對數行細字無  
偏頗吳江張子尚瑗弘遠才汗漫王子原令雲間衆所歎繼之作  
歌顛末詳驚怖其言若河漢吾衰筆力日已枯眼昏展卷尤  
模糊傍人爲我再三諷和之不得徒嗟吁吾生事事居人後  
况此強弓難挽手且醉鐙前酒百杯一笑置之藏拙醜

歸來



抱心多離憂惻惻動秋慮衣食豈不懷褰裳出門去明星在  
空霜在草荒野雞聲天未曉他鄉輾轉空爾爲歸來歸來心  
愈悲弱弟索錢女索食手持空囊豈堪泣

悲雪吟

愁雲凍雪十日陰竹枝如俯空庭深饑鳥啄啄遶茅屋荒涼  
四壁悲人心袁生昔日亦僵臥窮廬草木聞幽吟斯時饑凍  
死不異誰能裹飯相追尋我裘已敝兼苦薄况此栗烈寒威  
侵茶鑪無烟甕無酒殘雪更吹風入牖

江南曲

晴江散霧開初旭蕩漾新愁渺何屬春風吹入草木心悵望  
烟光挂空綠誰家高樓向江起牕中遠色通千里雛鶯警夢  
回衾香每恨啼時近簾底紅枝欲折催曉妝輕魂翦翦離花

牀美人貪睡應未足徘徊自弄雙明璫

烏啼曲

飄風飛葉落枯樹葉盡空枝結秋露羣鳥啞啞三匝遲月氣  
生寒莽烟霧閒房孤聽良夜殘關山夢破悲長路前林稍遠  
亦可棲何心近妾空閨啼

中宵

中宵顧影時復歌蕭然獨歎情如何濁醪滿壺醉不得高林  
搖落霜風多風聲颯颯葉聲碎饑鼠哀蛩警秋寐青燈照我  
四壁空古人落莫將無同

憤言

輕雲浮浮薄爲紙變幻誰能測終始漢高不負頡羹侯齊卿  
自遠於陵子謾言道路多囂塵骨肉於今有如此蠹簡初焚



心更傷貂裘已敝妻猶恥勞勞徒欲掣青萍浩浩何能歌白  
水君不見嗣宗千古磊落人一哭窮途痛於死

舟行

紫藤纏樹懸野香清溪歷歷澄幽光櫂聲初撥裂雲色菱絲  
荇帶吹烟長遠山微茫啣半影溼嵐不落空濛冷枯蓬短檝  
憑空行一葉虛浮去俄頃高林颯沓雨滴衣天驚石泣鳥不  
飛攫人突兀老松怒山精窳宰相因依寒陰初散孤蟾起鄉  
園擁隔悲千里驚湍汨沒魚龍哀風吹露下如秋水

七歌集句

長吟遣愁悲歌當哭我思古人實獲我心集七歌

十年失路誰知己擾擾塵中猶未已恒饑稚子色淒涼病僕  
呻吟呼不起當年意氣不肯平昨日論交竟誰是嗚呼一歌

兮歌已哀石田茅屋荒蒼苔

園中有棗行人食忍能對面爲盜賊有時長歎獨移時安知  
我有不平色秋風落葉閉重門白髮如絲歎何益嗚呼二歌  
兮歌始放江客不堪頻北望

意中索莫與先異春草青青新覆地年年歲歲一牀書不忍  
見之益愁思愁心反復夢難成天寒雁度堪垂淚嗚呼三歌  
兮歌三發中天夜久高明月

北風微雨虛堂秋昨日之日不可留四時不得一日樂朝夕  
催人自白頭仰天大笑出門去安能行歎復坐愁嗚呼四歌  
兮歌四奏傷心不忍問耆舊

世情付與東流水窮巷蒼苔絕知己巖扉松徑長寂寥東園  
幾樹桃花死愧爾東西南北人欲向何門躐珠履嗚呼五歌



今歌正長雌龍怨吟寒水光

世人結交須黃金郢中白雪且莫吟桃花欲開不自覺千里  
春色傷人心眼前好惡那能定隔葉黃鸝空好音嗚呼六歌  
今歌思遲一沉一浮會有時

天寒野陰風景暮落日疎鐘小槐雨寂寂寥寥揚子居惟有  
幽人自來去何用年年空讀書井底看星夢中語嗚呼七歌  
今悄終曲空庭細雨莓苔綠

禽言集句

泥滑滑豺狼塞道人斷絕關塞蕭條行路難白草山頭日初  
沒江天寂歷江楓秋橫笛一聲空淚流泥滑滑黃沙戍下悲歌  
發  
行不得也哥哥瞿塘五月誰敢過三年饑走荒山道少壯幾

時奈老何山高水濶誰辛苦青天漫漫覆長路行不得也哥  
哥此身誰願長奔波

不如歸去驚濤洶湧向何處黃金不多交不深翻手作雲覆  
手雨得意失意由一言世上悠悠安足論不如歸去更開花  
池種芳樹

提壺復提壺落花紛紛稍覺多請君酌我一斗酒花裏牽船  
水上歌事殊興極憂思集人生有情淚沾臆提壺復提壺百  
年歡樂能幾何

憶靈元禪師集句

風雨惟知長綠苔蛛絲結網生塵埃十年顧我醉中過空愧  
高僧數往來孤雲自在知何處瘦馬獨吟真可哀連峯去天  
不盈尺去住彼此無消息側身西望長咨嗟道路只今多擁



隔共師文字有因緣惟子眷眷長相憶雲木蒼蒼但閉關開  
門滿苑空秋色

題何閻先山水圖

何君善畫真絕竒抱才突兀傾城知邇來學道事黃老十年  
遁跡鴛湖湄著書五千言言具理亦存崑崙之源襲氣母始  
悟萬物歸其根波光嵐影疑有無更得披君山水圖千鈞健  
力隱毫末下筆直與神靈俱烟雲出沒勢不同元氣盤礴伊  
誰功古人已往不可作成法自變經營中吳越小兒強解事  
刻畫形似安能窮先生寫此良有以遼廓自欲披心胷吁嗟  
乎黃金丹液成九轉何不投筆一去隨赤松

丁巳五日寄俞犀月

茫茫宇宙何寥廓風氣相通若機括盤龍古鏡清若空遇物

妍媸析毛骨人生五倫難自裁獨於朋友可採掇屠沽微賤  
有投分况是文章共津筏嗟余力小愧負重行遠徃徃虞顛  
蹙僻居荒陋無師承用力甚多時搢搢久之漸覺窺其微瞽  
目似獲金鏡刮古之作者皆有意不似今人信塗抹賣田買  
書千卷餘誦讀但恐飢寒奪歲華荏苒歛衰老閉門願得飽  
粗糲徐子<sub>之松</sub>邀我過桐川不異山陰清興發是時主人編雅  
詩搜羅不憚精力竭蠅頭細字十手騰為屬贊助參毫末吳  
門寓詩幾百卷一一才氣皆蓬勃就中獨感和平音乃是俞  
君字犀月亂頭粗服亦自佳牝牡驪黃得髣髴與君本是疏  
分親宛似相連有瓜葛始知同調貴倚依維鳥有鸚獸有鵲  
姑蘇攜李二日程願一見之申審訥揚子一區靡所定蔣家  
三徑猶恍惚鹿床先生昨始來詢問起居得昭揭今年授書



木瀆關挽舟而北可造謁自春徂夏心怍怍妻孥交累有倉卒邇來佳節逢天中羣賢賦詩興超忽華堂深檻叢葵榴百罰娛嬉作佻達念君解館或閒居何不一擢向南撥麈麈得食思相呼鱸鮓羣遊畏逢獺此行所幸無雜賓相對不受雜亂聒當時置驛良殷勤北海開尊最踈豁神交自可窮夢寐詞達何須費簡札願言羽駕下秋空慰我多年飢與渴

泛鑑湖作

東南山水真絕奇千巖萬壑何參差晴烟乍吹吐深秀恍如翠黛開明眉際夜清輝轉幽迴須臾月出高峯頂流光泝影蕩鷗沙拂藻牽蘋亂漁艇依稀如霧混空明佳興留人去住情却疑銀漢天邊度匪直山陰道上行勝事曾聞謝康樂賀監風流宛如昨振衣濯足良在茲遙見心期共綿邈

寄彭仲謀兼柬令弟羨門

文人更相輕此事古已然况今衰薄日趨下誰從屠釣推貞堅鹽官獨有彭夫子汲引幽遐世無比郭泰人倫許劭評坐令末俗敦懿軌胡山天岫陽羨一書生賣藥來棲海上城新詩滿篋不堪煮瘦妻病母愁空鐙君能裹飯相尋數不使顛連赴溝壑屬和羊何世並稱謝家羣從多名作吾宗福柱白纜門弱齡亦有林生枚初發硎昨者攜詩走門下辱君獎借增光熒歸來佳詠相傳示賤子姓名蒙錄記無鹽刻畫難作容小巫神氣徒深愧海內名高汪琬與王士祿妻東吳偉業合肥龔孳不可當清真共挹王方伯庭雄健皆推曹侍郎溶吁嗟我

黨多貧賤朱夔李繩遠

尊李年

符

良

才華世方見漸川隱者

言

汝

東關

復

老成得自千錘鍊杜陵

平聲

譽早著聞番禺屈子

均



尤不羣陸

嘉淑

姜

宸英

李

因篤

顧

武炎

及三魏

際禧

直上皆欲干青

雲自餘才俊分超軼推挽後先安可失讀書曾不慕浮榮僕

與南村

繆永謀

同矩律令弟

孫通

從知慧業深許身直欲比南金

辭官虞寄多幽興卜宅陶潛有素心清文秀句人爭誦博取

諸家能錯綜連舍相呼應不遲青青池草西堂共企望風流

今幾春何當攜手作情親他時儻遂觀濤約並挹瓊枝玉樹

新

### 贈吳商志

丈夫身世何草草風絮波萍任顛倒知君遠作粵西游相逢  
忽在長安道未論舊事心已傷黯然那得開懷抱鴛鴦湖畔  
蔭華榭衡鑑高懸盛文藻李膺任昉兩龍門侵晨鶴蓋成陰  
早風塵瀕洞人事移兵戈滿地家焉保轉客真同管幼安經

營莫覓菟裘老羨君至孝動鬼神繼志心同秋日杲縱教甯  
戚終飯牛白水何能歌浩浩最憐故業盡荒蕪賜書千卷浮  
雲掃男兒弧矢亦自期躡岱浮湘恣遐討長沙憑弔楚三閭  
君哭孝章心自擣此道今人已寂寥吾徒不分存枯槁脂秣  
將行又惜離斯須握手春風好那及盧敖汗漫遊金芝擬拾  
蓬山島

### 過鼓行贈葉童子

名百順有字日觀止

君不見葉家童子生絕奇年纔五六多精思雙眸湛如髮覆  
額典謁不受字父欺比鄰湯翁髻垂白妙解聲樂情所怡管  
弦既停哀怨歇慷慨摻過行復爲童子從旁忽漏語其間一  
槌非合宜坐客驚起怪相訊答言音節我按之鼓高身矮不  
相及爲設重几裊交施八音克諧制在革疾徐高下無差池



聳然捲袂兩袍握神宇整暇手自追其聲淵淵如夙習實係  
天授非承師咄哉童子爾何異無乃典樂前身夔余生落莫  
日衰暮所向抑鬱多嗟咨常羨禰衡錄鼓吏漁陽一泄中心  
悲童子童子莫自棄功成樂作非無時登歌雅頌爾其選爲  
譜清廟明堂詩

采山堂詩集卷三終



